

# Agatha Caduff-Decurtins

27.11.  
92



Sonda, ils 7 da november ha ina respettabla cuminsonza da fideivels, Tessines e Tuatschins, accumpignau la defuncta Agatha Caduff-Decurtins alla fossa. Igl augsegner da Pura ha en siu riug luda la defuncta sco dunna ferma e da gronda cardientscha.

Naschida ei Agatha ils 23 da mars 1913 a Bugnei, sco feglia da Sep Antoni Decurtins e Brida Cathomen oriunda da Breil. Sco tier pliras outras famiglias tuatschinas ha la mumma dil bab dau alla famiglia la noda casa: Agatha – Gada. Aschia numnav'ins en Tujetsch quella famiglia ils Gaders. Quei fatg po documentar la peisa che mummas e dunnas havevan gia avon onns en famiglia ed era alla cuminsonza dil vitg, e quei senza cedel da votar. Cun aunc 7 fargliuns ei Agatha carschida si en relaziuns mudestas. E tuttina sereguardava la defuncta cun plascher da quels onns da giuventetgna. Era duront ils biars onns el Tessin ha ella mantenui in stretg contact cun sia patria nativa e legiu cun interess las novitads che la Gasetta Riomontscha purtava mintgamai en casa. Cura che la famiglia dil Sep Antoni ha lu surpriu igl uffeci da caluster a s. Vigeli ei la famiglia setratga da Bugnei a Sedrun, per esser pli damaneivel dalla baselgia.

1938 ei Agatha sospusada cun Gaudenz Caduff e priu dimora en «Tgèssalva». La famiglia crescha. Tier ils dus affons, ch'il vieu Gaudenz haveva ord l'emprema lètg, vegnan culs onns aunc 8 vitier, 4 feglias e 4 fecls. Il davos da quels ei naschius pér el Tessin.

1947 sedecidan ils consorts da bandunar Tujetsch. Cheu ei l'Agatha veramein secumprovada sco dunna ferma. Igl ei schon in ughetg da pachetar in en-

tir tenercasa e serender cun ils affons ed il muvelet ch'ei possedevan egl jester. Ei era sco da tedlar in roman cura che Agatha raquintava da quella midada. A mi vegnev'e lu endamen in'episoda ch'jeu havevel giu sco buob da 6 onns sin «Gionda»: Ina famiglia era leu vid il prender cumiau da Tujetsch per serender ell'America. Jeu havevel lu tertgau: Speranza vegn ei buc endamen a miu bab dad ira ell'America. Buca paucs Tuatschins han ughiegiau ed igl ei per biars gartegiau.

El Tessin ei la famiglia Caduff-Decurtins secasada sin in pign bein puril denter Pura e Ponte Tresa. Ils affons havevan dad ir a scola a Pura, in viadi da circa mesura atras igl uaul. Suenter in pèr onns ha la famiglia lu giu caschun da cumprar ina casa el vitg ed empau funs ella vischinanza. Aschia ein ils Caduffs setschentai definitivamein en quei bi vitg dil Malcantone. Ils affons vegnan gronds e van lur via ed il bab Gaudenz miera suenter ina liunga e greva malsogna gia 1971. Aschia ei Agatha pli u meins persula, schegie che duas feglias ein secasadas ella proxima vischinanza. Grond plascher haveva la defuncta mintgamai cura ch'ei deva viseitas giu da Tujetsch e specialmein cura che siu frar P. Pellegrino d.p.m. arrivava si da Lugano. Ella savevi lu schon tgei ch'ella hagi da cuschinar: Suppa da giutta ni pulenta barsada misschedada cun truffels. Lu eri il pader cuntents ed els schevien reviver reminiscenzas da Bugnei e Sedrun. Aunc in detagl: Cun larmas els egls menziunava Agatha la benedicziun ch'il plevon sur A. Fetz havevi pertau en casa avon la partenza.

E sco ei va ella veta, ils davos onns ein da tuttas uisas debladads sefatgas valer. Aschia ha ella stuiu serender pliras gadas el spital e la finfinala egl asil a Castelrotto. Cun pazienza e cardientscha ha Agatha purtau e supportau tuts quels mals, e perquei ha il plevon da Pura en siu riug numnau ella ina mumma e dunna da profunda cardientscha.

Ellas viaspräs da Numnasontga stattan ils plaids: «Da tschella vart dalla mort spetga sin nus la veta». Quella veta en paisch e raus giavischein nus ussa da cor alla defuncta. La glisch perpetna sclareschi ad ella!

Sur Giusep Berther, Bombinasco